

Dados relatados 07 Abril 2021

SUMÁRIO

- Timor-Leste simu ona grupu dahuluk vasina COVID-19 iha loron 5 Abril 2021. Aviaun aluga especialmente hodi lori vasina Oxford AstraZeneca doze 24,000. Ida ne'e grupu dahuluk husi 20% ne'ebé Timor-Leste elijivel atu simu liu husi COVAX facility.
- Ministériu Saúde lansa ona kampaña imunizasaun COVID-19 iha loron 7 Abril 2021, koincidencia ho Loron Mundiál ba Saúde 2021 ho tema “harii mundu ne'ebé justu no saudavel”. Kampaña imunizasaun ida ne'e lansa iha direasaun Servisu Saúde Munisípiu Dili iha Formosa, Dili. S.E Primeiru Ministru Taur Matan Ruak mak sai ema dahuluk simu vasina COVID-19 hodi marka lansamentu kampaña imunizasaun ida ne'e. Iha faze dahuluk husi kampaña imunizasaun COVID-19, Ministériu Saúde sei vasina uluk grupu prioridade sira ne'ebé identifika ona iha Planu Nasionál Distribusaun Vasina ne'ebé desenvolve ho apoiu husi OMS no UNICEF. Grupu prioridade sira kompostu husi pesoál saúde, pesoál liña frente, no pesoál esensial sira ne'ebé fó apoiu ba responde COVID-19. Faze tuir mai sei fó ba grupu idade 60 ba leten, ema sira ne'ebé ho komplikasaun moras hanesan diabetes, moras fuan, tensaun alta no moras seluk tan.
- Ministeriu Saúde relata tan kazu foun hamutuk **231** dezde kazu relata ikus iha loron (31.03.2021) – no lori total kazu COVID-19 relata iha Timor-Leste hamutuk **1,010**. Kazu hotu-hotu identifika liu husi rastreiu kontaktu no teste masál no iha ligasaun ho kazu agrupamentu sira. Paciente hotu agora tama baixa ona iha facilidade tratamentu no izolamentu iha Tasi Tolu no Vera Cruz.

To'o ohin loron, 07.04.2021 – Laboratório Nasionál Saúde hala'o ona **46,495** teste COVID-19.

Ekipa vijilánsia sira halo ona investigasaun klean no rastreamentu kontaktu. Ba informasaun kompletu liután kona-ba kazu foun bele hare iha pájina Facebook Ministériu Saúde, [Palacio Das Cinzas](#)

SITUASAUN IHA NÚMERU

Total no kazu (foun) iha Timor-Leste

835 konfirmadu (foun **231**)

388 rekupera (foun **199**)

447 kazu ativu

1 mate

(Bazeia ba dados ne'ebé pública iha [Ministerio da Saúde](#))

Tuir pájina WHO Timor-Leste [Facebook](#) no [Twitter](#) no [MS](#)

Ba informasaun klean liután no guia husi OMS kona-ba surtu atuál Moras Coronavirus – 2019 (COVID-19) bele asesu iha [ne'e](#).

SITUASAUN GLOBÁL

Total kazu (foun) iha loron hitu nia laran

Globalmente


130 459 184 Konfirmadu (**4 038 292**)



2 842 325 Mate (**71 355**)

- Timor-Leste rejista kazu mate dahuluk tanba COVID-19 iha loron 6 Abril 2021. Inan feto ho idade 44 sofre moras tensaun alta, no moras rins no hakotu iis ida Ospital Lahane iha Dili, tuir relatóriu husi MS.
- MS lansa ona Timor-Leste Health Information System – COVID Immunization Tracker (TLHIS-CIT) iha loron Kuarta iha tempu hanesan lansamentu kampaña imunizasaun COVID-19. COVID Immunization Tracker (CIT) ne'e dezeña no integradu ona ba iha Sistema Informasaun Saude Timor-Leste ka TLHIS. OMS Timor-Leste fó apoiu tékniku hodi dezentolve no integra CIT ba sistema TLHIS atuál.
- Ministra Saude, S.E dr. Odete Maria Freitas Belo, hamutuk ho Representante OMS Dr Arvind Mathur ho Ekipa OMS Timor-Leste, partisipa iha enkontru entre Membru Estadu OMS Rejiaun Sudeste Aziatiku, liuhusi virtuál – husi eskritóriu OMS Timor-Leste nian, hodi komemora Loron Mundiál ba Saude 2021. Ministrus Saude husi nasaun sira iha Rejiaun ne'e no OMS hamutuk iha kompromisu hodi “harii mundu ne'ebé justu no saudavel”, hanesan tema Loron Mundiál ba Saude tinan ida ne'e nian, iha eventu nivel altu ida ne'e.
- Alende, pandemia COVID-19, Timor-Leste mós enfrenta inundasaun iha rai laran iha loron 4 Abril. Udan boot ne'e hamate ema besik 36 tuir relatóriu provizóriu. Inundasaun ne'e akontese iha parte barak iha territóriu tomak ne'ebé kauza ema rihun mak lakon sira nia uma, estraga infraestrutura barak – ponte no Estrada. Iha Dili kuaze ema 9,908 maka evakua ba fatin evakuasaun 30, ne'ebé maka hetan apoiu husi públiku fornese husi organizasaun umanitáriu inklui OMS no organizasaun privadu sira.




Data notifikasaun kazu foun no kumulativu COVID-19 iha Timor-Leste
(Kazu Foun-56 Kumulativus-835)





Distribusaun tuir Munisipiu: Kazu pozitivu
Dili : 728 | Munisipiu seluk : 107



OMS TIMOR-LESTE NIA OBJETIVU ESTRATÉJIKU

- Hapara moras da'et hosi ema-ba-ema inklui hamenus infesaun sekundáriu entre sira ne'ebé maka iha kontaktu besik no pesoál saúde sira, haforsa liután prevensaun transmisaun kazu;
- Haforsa Sistema vijilánsia no aumenta kapasidade laboratóriu hodi detekta kazu COVID-19;
- Garante katak halo tuir duni padraun ba Prevensaun no Kontrole Infesaun (PKI) ne'ebé rigorozu tebes no hasa'e kapasidade ba PKI nian;
- Identifika, izola no kuida ba pasiente; inklui fornese mós kuida óptimu ba pasiente ne'ebé infetadu;
- Halo sosializasaun ba informasaun risku no eventu ba comunidade hotu-hotu no hakotu informasaun la loos liuhosi servisu hamutuk ho parseiru sira.
- Hamenus impaktu sosiál no ekonómiku liuhosi parseria multisetorál.
-

REKOMENDASAUN NO KONSELLU BA PÚBLIKU

Fase ita-nia liman beibeik

Fase ita-nia liman ho dezinfetante ka fase ho sabaun no bee

Tanbasá? Fase ita-nia liman ho sabaun no bee ka uza dezinfetante sei oho virus ne'ebé hela iha ita-nia liman.

Mantein distánsia fíziku

Mantein distánsia fíziku pelumenus metru 1 (pasu 3) distánsia hosi ita nian a'an no ema seluk.

Tanbasá? Bainhira ema me'ar ka fani sira bele hada'et mós ho turuk-oan sai hosi sira-nia inus ka ibun ne'ebé dalaruma kontamina ho virus. Se ita besik loos ema ne'e, ita bele dada iis tama fali turuk-oan ne'e, inklui ho virus COVID-19 karik ema ne'ebé me'ar infetadu hela.

Uza maskára bainhira distánsia fíziku la posível

Tanbasá? Bainhira ita iha fatin ne'ebé susar atu mantein distánsia fíziku metru ida ka liu tanba fatin kloot, importante tebes atu uza maskára atu hapara transmisaun COVID-19 nian.

Evita ka'er ita nia matan, inus no ibun

Tanbasá? Ita-nia liman ka'er fatin barak no bele da'et virus ne'e. Bainhira kontaminadu ona, hosi liman bele transfere virus ba matan, inus ka ibun. Hosi ne'e, virus ne'e bele tama ba ita-nia isin no halo ita moras.

Prátika Ijiene Respiratóriu

Tenki asegura ita-boot, no ema ne'ebé besik ita, atu halo tuir ijiene respiratóriu. Ida ne'e signifika katak taka ibun, no inus ho liman sikun ka uza tixu bainhira me'ar or fani. Depois soe kedas tixu ne'e ba lixu fatin.

Tanbasá? Pártikula hada'et virus. Halo tuir ijiene respiratóriu, ita-boot sei proteje ema ne'ebé besik ita hosi virus hanesan inus metin, flu no COVID-19.

Se ita-boot isin-manas, me'ar no dada iis araska, buka lalais tratamentu

Hela iha uma bainhira moras. Se isin-manas, me'ar no dada iis araska, buka lalais tratamentu médiku no telefone uluk. Halo tuir instrusaun hosi autoridade saúde.

Tanbasá? Telefone antes sei permiti pesoál saúde sira atu bele direta ita-boot ba facilidade saúde ne'ebé loos. Ida ne'e sei ajuda proteje ita-boot no ajuda prevene hada'et virus no infesaun seluk.

Buka hatene informasaun no halo tuir konsellu ne'ebé pesoál saúde sira hatoo

Buka hatene nafatin informasaun ba dezvoltimentu ikus kona-ba COVID-19. Halo tuir konsellu ne'ebé ita-boot nia pesoál saúde sira hatoo, husi autoridade saúde nasionál no lokál, ka empregadór kona-ba oinsá atu proteje ita-nia an no ho ema seluk husi COVID-19.

Tanbasá? Autoridade nasionál no lokál sei iha informasaun atualizadu kona-ba karik COVID-19 da'et iha ita-nia área. Sira maka fatin di'ak liu atu hetan konsellu kona-ba saida mak ita tenki halo hodi proteje an.

Proteje ita nia an no sira ne'ebé ita hadomi hosi #COVID19:

- Taka ibun no inus bainhira me'ar
- Labele ka'er matan, inus no ibun
- Evita ba fatin públiku no limita tempu iha espasu ne'ebé taka metin
- Bainhira distansia fiziku la posivel, obrigatóriu ba ita atu uza maskára
- Mantein distánsia metru ida ka liu hosi ema seluk
- Hamoos beibeik objetu no fatin sira ne'ebé ita kaer beibeik
- Izola an hosi ema bainhira sente moras no buka tratamentu, bainhira presiza

Ba matadalan kona-ba medida preventiva seluk disponivel iha [ne'e](#).

Informasaun COVID-19 Information no kontaktu média:

- Ministériu Saúde estabelese ona número *hotline* – 119 – ba COVID-19 ne'ebé maka ema hotu-hotu bele telephone hodi hetan informasaun relasiona ho COVID-19
- Alende ne'e, [Pájina Facebook MS](#) nian fornese atualizasaun loloos kona-ba dezvoltimentu COVID-19 iha rai laran

- OMS Timor-Leste liuhosi nia [Pájina Facebook](#) no [Twitter](#) mós disemina informasaun kona-ba medida preventive, pergunta no resposta, *myth-buster* no atualizasaun ikus kona-ba COVID-19 iha mundu tomak no iha rai laran. Ba media no pedidu ba entrevista bele manda ba singhsho@who.int no hasane@who.int